

---

## ТУРКИЯДА ФАРҒОНА ВИЛОЯТИНИНГ ИНВЕСТИЦИОН ТАҚДИМОТИ БЎЛИБ ЎТДИ

Хабар қилганимиздек, Фарғона вилояти тадбиркорлари вакиллари Туркиялик ҳамкасблари, Гебзе саноат зонаси раҳбарияти билан ҳамкорликда янги корхоналар ташкил этиш масаласида ўзаро музокаралар олиб бормоқдалар. Бугун уларни Гебзе шаҳри валеси ўринбосари Саломат Гунер қабул қилди. У Ўзбекистон – Туркия муносабатларини мустаҳкамлаш, савдо айланмаси ҳажмини оширишда Гебзе шаҳри ва Фарғона вилоятлари ҳокимликларининг саъй ҳаракати ҳам алоҳида эътиборга мойил, деди.

- Шу ойда Гебзелик тадбиркорлар Фарғона вилоятида бўлиб Қўқон эркин иқтисодий зонасида янги корхона очиш истагини билдирган эдилар. Сизларнинг ташрифингиз бу амалий алоқаларни янада мустаҳкамлайди ва кенгайтиради, - деди у.

-Биз учун Гебзе саноат зонаси тажрибаси ибратлидир, - деди Фарғона вилояти ҳокими ўринбосари Мухсинхўжа Абдурахмонов. – Мақсадимиз ўзаро ишонч асосида заргарлик, кўнчилик ва қурилиш индустрияси соҳасида ҳам қўшма корхоналар ташкил этишдир.

Саломат Гунер Ўзбекистонда рўй бераётган ислохотлар тўғридан –тўғри инвестиция киритиш имкониятларини осонлаштирди ва биз буни муносиб қадрлаймиз. Келгуси йилдан ҳамкорликдаги яна бир неча корхоналар ташкил этилишига кўмаклашамиз, деди.

Шу куни Гебзе савдо-саноат палатасида юзга яқин турк тадбиркорлари билан учрашув бўлиб ўтди. Дастлаб Гебзе шаҳри ва Фарғона вилояти инвестицион имкониятларининг видео тақдими бўлиб ўтди. Сўнгра Гебзе савдо-саноат палатаси бошқаруви раиси Наил Чиллар ва Мухсинхўжа Абдурахмоновлар сўзга чиқиб, икки мамлакат тадбиркорлари саволларига жавоб бердилар. Шундан сўнг уларнинг юзма-юз мулоқотлари бўлиб ўтди. Айти дақиқаларда шартнома ва меморандиумлар имзоланмоқда.

Гебзе шаҳридан, Муҳаммаджон Обидов

Туркия

Фарғона вилояти ҳокимлиги Ахборот хизмати

2019-11-29 09:56:12